

Meeqqat 18-inik ukioqalernissami tungaanut pisortat ingerlataannik angalatitsiviit aqqutigalugit angalasussaattillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allangortinnissaannik tunngaviliissaaq, kingusinnerpaammilu UPA2025-mi inatsisartunut saqqummiunneqassalluni

(Inatsisartunut ilaasortaq Jens NapätôK, Naleraq)

Soraarninngornikut pisortat ingerlataannik angalatitsiviit aqqutigalugit akikinnerusumik angalasinnaanerit ukioq naallugu atuutilernissaa aammalu soraarninngornikunut billetsit ukioq naallugu killeqanngitsumik pisiassaasinnaanerit aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq soraarninngornikut akikinnermik angalasarnerannut malittarisassat allangortinnissaannik tunngaviliissaaq, kingusinnerpaammilu UPA2025-mi inatsisartunut saqqummiunneqassalluni.

(Inatsisartunut ilaasortaq Jens NapätôK, Naleraq)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Jens NapätôK aalajangiiffigisassatut siunnersuutinik soqutiginaatilinnik marlunnik, ilaasunik angallassineq pillugu oqallinnermut pingaarutilimmut tapertaasunik saqqummiussineranut qutsavigaara.

Naalakkersuisunit innuttaasut tamarmik, qanorluunniit ukioqaralarunik isertitaqaralarunilluunniit nuna tamakkerlugu angalanissamut periarfissaqarnissaat pingaartinneqartorujussuuvoq. Taamaattumik Naalakkersuisunit aalajangiiffigisassatut siunnersuut tikilluaqqarput. Angalanernut atatillugu meeqqanut, inuusuttunut soraarnerussutisialinnullu akikillisaassisarnermik misissuineq, innuttaasuni eqimattat tamarmik angalanissamut periarfissaannik qaammarsaaqataasussaavoq.

Kikkut tamarmik nunatsinni sumi najugaqarnertik apeqqutaatinnagu ilaquuttaminnut tikeraarsinnaanissaat Naalakkersuisunit pingaarutilerujussuuvoq. Pisariaqartitsineq tamanna aamma inuusuttunut utoqqaanerusunullu atuuppoq, taamaattumik Naalakkersuisunit meeqqanut bilitsinut ukiut killigititat ukiunik 12-iniit 18-inut qaffanneqarpata, aammalu soraarnerussutisialinnut akikillisaatit atuuffii annertusineqarpata tamanna aningaasaqarnikkut qanoq kinguneqassanersoq pillugu misissuinissaq tapersorsorparput.

Meeqqanut, inuusuttunut soraarnerussutisialinnullu akikillisaatit annertusineqarpata, tamanna ingerlatseqatigiiffinnut, pisortanit pigineqartunut, Air Greenland A/S-imut aamma Arctic Umiaq Line A/S-imut qanoq kinguneqassanersoq siunnersuuteqartup Naalakkersuisut

misissuequllugit qinnuigai. Nunatsinnili ilaasunik angallassineq taamaallaat suliffeqarfinnit marlunnit, matuma siuliani taaneqartunit ingerlanneqanngilaq, aammali ingerlatsisut allat arlalippassuupput, taakkunungalu Namminersorlutik Oqartussat kiffartuussinissamik isumaqatigiissuteqarfigisai arlallit ilaapput.

Kiffartuussinissamik isumaqatigiissuteqarfigineqarlutik angallassisut tamarmik nunatta ataqatigiinnerata ingerlaannarnissaanut suleqataapput, aammalu pineqartup itisiliiffigalugu misissuiffiqarfigineqarnissaa qulakkeerniarlugu, misissuineq annertusillugu sullissisut, Namminersorlutik Oqartussat ilaasunik angallassineq pillugu isumaqatigiissuteqarfigisaasa tamarmik ilaatinneqarnissaat siunnersuutigineqarpoq.

Tamatuma saniatigut ingerlatseqatigiiffinni assigiinngitsuni soraarnerussutisialinnut akikillisaatit assigiinngitsunik annertussusilerneqartarput, ilaat siusinaartumik soraarnerussutisialinnut, assigiinngitsunillu akilinnik akikillisaasiisarlutik. Taamaattumik Naalakkersuisunit siunnersuutigissavarput, aalajangiiffiqarfigisassatut siunnersuutit aaqqiissuteqarfigineqassasut, taamaalilluta sammisaq assigiinnik periaaseqarluta misissuiffiqarfigisinaaniassagatsigu.

Tamanna tunngavigalugu Naalakkersuisunit immikkoortoq 94-imut allannguutissatut siunnersuut imaattoq saqqummiunneqarpoq:

Ilaasut kiffartuussinermut isumaqatigiissuteqarfigiusunut ilaallutik angalasartut 18-it tikillugit ukiullit meeqqatut akikillisaaffiqarfigineqartarnerisa aningaasaqarnikkut kingunerisassai pillugit Naalakkersuisut misissuinissamut peqquneqarnissaannut Inatsisartut aalajangiiffiqarfigisassaattut siunnersuut. Misissuineq meeqqanut akikillisaatit pillugit oqallinnissamut tunngaviliissaaq, aammalu UPA2025-mi Inatsisartunut saqqummiunneqassalluni.

Tamanna tunngavigalugu Naalakkersuisunit immikkoortoq 105-imut allannguutissatut siunnersuut imaattoq saqqummiunneqarpoq:

Soraarnerussutisiallit aamma siusinaartumik sulisinnaajunnaarneriutillit ukioq kaajallallugu 50%-inik akikillisaanneqartalerpata, tamanna qanoq akeqassanersoq, kiisalu bilitsit akikillisaatitallit killeqanngitsumik amerlassusilerneqarnissaannut misissuinissamut Naalakkersuisut peqquneqarnissaannut Inatsisartut aalajangiiffiqarfigisassaattut siunnersuut. Tamatumani soraarnerussutisialinnut akikillisaasiisarnermut maleruagassap allanngortinneqarnissaa, taamaalillunilu ukioq kaajallallugu atuuttussanngortinneqarnissaa, aammalu amerlassutsit killeqarunnaarnissaat siunnerfigineqassaaq. Misissuineq soraarnerussutisialinnut maleruagassanik allannguinnissamut tunngaviliissaaq, aammalu kingusinnerpaamik UPA2025-mi Inatsisartunut saqqummiunneqassalluni.